

دارالفنون مفرد فائزله شیخ محمد علی

صافی : ۲

مایس ۱۳۳۲

سنة : ۱

قسم حقوقی

مناسبات دولیه

معاهدات نقطه نظرندن ایران

و

ایرانده اجانبک وضعیت عهدیه و حقوقیه سی

بشریت مضطربیه نك شمدي به قدر كورمديكي شو جدال عظيمده قومشومن ايرانك بولنديني حال، جداً شايان تألمدر . سنه لجه استبدادك اك قوي زنجيرلری آئنده ايكله ين و اك مدهش جهالتك نتیجه سندن قورتولاميان زواللی ايران، داخلنده كي كابوس قهر و ظلمدن صيرملق اوزره ايكن انكليز و موسقوف پنجه سنه دوشدی . انكلتره ايله روسيه آره سنده ۱۹۰۷ ده ايرانك ايكي منطقه نفوذه تقسيمی ايجين ائتلاف افكار حاصل اولدی . ايشته ايرانك فلاکت وادباريني اكمال و اتمام ایدن معاهده نامه بودر . پك مهم بر قومشومن اولق اعتباريله ايرانك احوالنی تعقيب و مطالعه به مجبورز صانيرم . ايرانك شمدي به قدر كرك بزم ايله كرك دول سائر ايله عقد ايتديكي معاهداته بر نظر رجی عطف ايتك واجانبك ايرانده كي وضعیت عهدیه و حقوقیه سنی مطالعه ايتك موجب فائده اولسه كركدر . ايران ايله مناسباتمرك تأسسندن صوك زمانلره كلنجه به قدر حكومتين آره سنده منعقد معاهداتك اك مهم اقسامنی پيش مطالعه به وضع ايلدكدن صوكره دول سائر ايله ايرانك عقد ايلديكي معاهداتی بالتعداد بعضيلرينك احكام اساسيه سنی ذكر ايتكي موافق

بولدم . بونلرك مطالعه سندن و ايران مؤسسات عدليه و اداريه سنك تدقيقندن صوكره اجانبك ايرانده حائر اولدقلى حقوق و وضعيت تعين ايدر .

ايران، دولت عثمانیه نك بدايت آئسنده ايلخانياندين سلطان محمود غازان يدنده بولمقده ایدی . برمدت صكره طوائف ملوك يدنده پارچه لائمش و بونی متعاقب دولت عثمانیه ايله ايران آره سنده مناسبات باشليه رق اولاً بعض مخبرات سياسيه وبعده چالديران محاربه سيله دها برچوق محاربات ميدانه كمشدر . بونلری متعاقب عقد اولنان معاهده نامه لر، طرفينك وضعيت سياسيه و حدوديه سنی تعينه مدار اولمش ايسه ده بونلرده طرفين تبعه سنك يكدیكری ممالك كنده مظهر اوله جقلى معاملات و وضعيت حقوقيه دائر احكام و تصریحاته تصادف اولته مامشدر . ايران ايله ايلك معاهده من ۱۰۴۹ تاريخ هجري سنده سلطان مراد رابعدن شاه صفیه ارسال ايدیلن بر نامه های بوندن [*] عبارت اولوب باشليجه احكامی طرفين ممالكنك حدوديني تعين و چهار يار كزين وساير اصحاب كرام وائمه مجتهدين حق لرنده زباندرازلقه ميدان ویرلمه سنی توصیه و ايران جانبندن مغاير صالح بر حرکت اولدقجه بو طرفدن شروط و قيوده رعایت اولته جغنی بياندن عبارتدر .

متعاقباً ۱۱۴۰ و ۱۱۴۹ و ۱۱۵۹ ده عقد اولنان معاهده نامه لرده ۱۰۴۹ حدودينك معتبر اولمسته، حاجيلره، اوچ سنده بر مأموركونرلمه سنه، ترضیه اصحاب كرامه، فضله رسوم و كمرک آلتامه سنه، فراريلرك اعاده سنه و مناسبات حسنه ادامه سنه عائد بعض احكام مندرج بولمشددر .

روم فترتنك و خاتمندن دولاي دولت عثمانیه عارض اولان ضعفندن استفاده املنه دوشن ايران شاهى فتحلى شاه ۱۲۳۶ ده دولتمزده اعلان حرب ايتمش و ۱۲۳۸ ده ارض رومده عقد اولنان ارض روم معاهده نامه سيله حربه نهايت ویرلمشددر . ايران دولتی ايله احكام مهمه نى حاوی اوله رق عقد اولنان ايلك معاهده نامه بودر .

بو معاهده بر مقدمه، بر اساس، بر شرط، یدی ماده و برخاتمندن عبارتدر. اساسده ۱۱۵۹ تاريخلى معاهده نامه ايله تقرر ایدن حدود قديمه نك مرعیتی، حجاج و تجاره عائد احكام ايله فراريلرك اعاده سنی، اسرآنك بر اقله سنی، طرفيندن شخص معين اقامه سنی (شهنذر) و ترضیه اصحاب كرام ماده لرینك معتبر و مرعى طوقلى و شرطده معاهده

[*] مجموعه معاهدات، جلد ۲ ص ۳۰۸ - ۳۱۲ .

نامه نك ادا مہ سی، عثمانلی قلعہ و شہر لرینك آلتش كون ختامہ قدر دولت عثمانیہ یہ تسلیمی و بر اقیلان اسرایہ یولده ما کولات اعطاسی خصوصاتی ذکر ایدلمش در.

برنجی ماده: بغداد و کردستان امورینہ مداخلہ اولنخامسنہ و یابلاق و قیشلاق رسوم عادیہ سی نزاعنك بغداد والیسی ایله شہزادہ عباس میرزا آرہ سنہدہ بالخبارہ حل اولنمسنہ دائر در. ایکنجی ماده: حجاج وزوار ایرانیہ و مکرمک و تجارتدن باحشر. بو ماده دہ [بونلرک (ایران حاجیلرینك) تگون ایدن نزاعلری صرہ ہایون امینی نظارتی و ایچلرندن معتمدلری معرفتیلہ رؤیت قیلنہ] دیبہ بر قید وارد در.

اوچنجی ماده: حیدرانلی و سبیکلی و شیرتلرینہ و بشنجی ماده، حرب ائناسندہ حفظ و توقیف اولنان تجارت اشیا و اموالنك اعادہ سنہ، آلتنجی ماده طرفین ممالکنندہ بلا و لدوفات ایدنلردن وصی شرعیسی اولیانلرک ترکہ لرینہ، یدنجی ماده ہر اوچ سنہدہ بر دیکشدر مک اوزرہ طرفین ممالکنندہ برر مأمور اقامہ سنہ و حرب ائناسندہ طرفین ممالکنہ کچمش اولانلرک عفو لرینہ دائر در.

خاتمہ دہ اموال مغضوبہ و ضایعات و تضمینات حربیہ دن صرف نظر ایدلمسی و طرفیندن اورتہ ایچیلر کوندرلمسی و خلاف معاہدہ منعقدہ حرکاتدن اجتناب اولنمسی خصوصاتی مسطور در.

سلطان عبدالمجید خان زمان سلطنتندہ ایران شاهی محمدشاه ایله ارضروم دہ ۱۲۶۳ دہ [*] ایکنجی بر معاہدہ نامہ تنظیم اولنمشدر. بو معاہدہ نامہ نك طقوزنجی ماده سنہدہ تصریح اولدینی اوزرہ معاہدات سابقہ و با خصوص ۱۲۳۸ سنہ سنہدہ ارضروم دہ عقد اولنان معاہدہ نامہ نك معاہدہ حاضرہ ایله تغیر اولنمیان موادی ابقا ایدلمشدر.

۱۲۶۳ معاہدہ سنك باشلیجہ احکامی ذہاب سنجانك دولت عثمانیہ و محمرہ شہر و بندری و جزیرہ الحضر و جانب یسار شط العربك ایرانہ عائدیتی و شط العربك دکرہ منصب اولدینی محلدن تا طرفین حدودینك التحاق موضعنہ قدر نہر مذکور دہ ایران سفینہ لرینك سربستی سیر و سفری و تحدید حدود ایچون مأمورلر تعیینی و مرعالر رسومی و فراری ایران شہزادہ لرینك بروسہدہ اقامہ سی و دیگر فراریلرک معاہدات سابقہ وجہ ایله اعادہ سی و مکرمک رسومنك عیناً و یا نقداً ایفاسی و زوار و تبعہ سائرہ ایرانیہ نك ممالک عثمانیہ دہ حسن معاملہ کورملری کبی خصوصاتی حاوی اولوب اك اہمیتلی اولہ رق شو حکمی

[*] [مجموعہ معاہدات ج ۳ ص ۵]

محتویدر: «مکه مکرمه مدینه و منوره دن ماعدا ممالك عثمانیه نك لازم كلن جميع محالرنده دولت ايرانيه طرفدن شهیندرلر تعیین ایدیله بیلمسی و بو شهیندرلرک سائر دول متحابه قونسولری حقده جاری اولان كافة امتیازاته مظهر اولمسی و ممالك ايرانيه نك لازم كلن جميع محالریته نصب و تعیین اوله جق شهیندرلر حقده و ایران ممالکنه آمدشد ایدن تبعه و تجار دولت عثمانیه حقنرنده ایران دولتی طرفدن دخی معامله متقابله نك کاملاً اجرا قلمسی.»
بالآخره ایران حکومتیه [*] ۱۲۸۰ ده ایکی عدد تلغراف مقاوله نامه سی و ۱۲۸۱ ده کذا تلغراف خطوطنه و ۱۲۸۶ ده حدوده و ۱۲۸۷ ده نقل امواته و ۱۲۸۸ ده بغدادده متحدث اختلافک صور تسویه سه متدائر استلافنامه لر عقد اولمشدر.

مواد مندرجہ لری خلاصه بیان اولان معاهدات، اساس اعتباریله تبعه عثمانیه نك ايرانده و تبعه ايرانيه نك ممالك عثمانیه ده وضعیت حقوقه لری تعیین و تثبیت ایتوب صرف وقوعه کلن حربلر دن صکره علی الاصول اتحاذی ایجاب ایدن مقررات و تداییدن عبارتدر .

اجنیلرک ممالك عثمانیه ده استفاده ایتدکلری عهود عتیقه امتیازاتی، ماوضع لهندن چیقهرق سوء استعمالانه اوغرامش و هر قوی دولت بر طاقم تعاملر وجوده کتیره رک امتیازات مذکورہ فی توسیعہ چالشمقده بولنش اولدقلری صرہده ايرانیلرله آرہ مزده صیقجه صیقجه ظهور ایدن حربلر و هم حدود اولمقلمز، ایکی حکومت آرہ سندہ کی مناسباتی تکثیر و توسیع ایلش و بالخاصه طبعاً زراعت ایشندن زیاده تجارتله انسیت ایدن ايرانیلرک عددلری ممالك عثمانیه ده کوندن کونه زیاده لشمش اولدیغندن بونلرک وضعیت حقوقه لری نك تثبیت باب عالیجه لزوم قطعی کورلمش ایدی .

ایشته بومقصدک استحصالنی تأمیناً دولت عثمانیه ایله ایران دولتی بینده منعقد و موجود اولان معاهدات ایله مصدق و مرعی الاجرا اولان مقاوله نامه لرک احکامی کما کان باقی اولمق اوزره فی ۳۱ ذی القعدہ ۱۲۹۲ و ۸ کانون اول ۱۲۹۱ تاریخنده خارجیه ناظری بولان محمد راشد پاشا ایله ایران سفیری حسن خان آرہ سندہ مواد مهمه فی حاوی اوله رق بر مقاوله نامه تنظیم اولمشدر . طرفین تبعه نك یکدیگری ممالکنده وضعیت حقوقه لری تعیین و تثبیت ایدن یکانه مقاوله نامه بودر . بونک احکام عمومیه سی بوجه آتی اجمال اولنور :

ممالك عثمانیه ده تبعه ايرانيه نك قباحت، جنحه و جانیته متعلق كافة خصوصانده طوغریدن طوغری به قوانین و نظامات دولت عثمانیه به و بلا واسطه ضابطه و محاکم سلطنت

سویه به تابع اوله جقلرینه ، تبعه ایرانیه ایله تبعه عثمانیه بیننده تجارت و حقوق عادیه به متعلق تگون ایده بیله جك بالمله دعاوی واختلافاتك محاکم دولت عثمانیه ده حل وفصلنه و بواننده محاکمه ترجان حضوری جائز اولدیغنه واعلاماتك تنفیذی سفارت وشهیندرلر واسطتیه اجرا اولنه حق ایسه ده بوخصوصه تأخرات ایقاع اولندیغی تقدیرده طوغریدن طوغری به مأمورین دولت طرفندن اجرا قانه جغه وایرانلرک اصنافلق ، حرفت وصناعت خصوصلرنده قوانین ونظامات عثمانیه به تابع اوله جقلرینه وایران شهیندر وشهیندر وکیللری وترجانلری دول سائرته عینی صفتده بولنان مأمورلرینک نائل اولدقلری امتیازات ومعافیات ومساعداته مظهر اوله جقلرینه وایران مأمورین شهیندرینک وظیفه وصلاحتلرینه وممالک عثمانیه به کلوب کیدن وسیاحت ایدن تبعه ایرانیه نک اجنبیالک صفتنه خلل کلیه جکنه وایرانلرک خدمات وبدلات عسکریه دن مستثنی طوتیه جغه وتبعه ایرانیه بیننده متکون دعاوی وجرائمه متعلق امورک فصل ورؤیتنه ایران شهیندرلرینک وظیفه دار اولدقلرینه وبونلر طرفندن تبعه ایرانیه دن استیفا اولنان رسوم وتکالیفه مأمورین عثمانیه جه مداخله اولمیه جغه ، تبعه ایرانیه نک تابعیت عثمانیه قانونی احکامی دائره سنده تابعیت عثمانیه به قبول اولنه جقلرینه ، ایرانلره بخش اولنان مساعداتک ممالک ایرانیه ده بولنان تبعه عثمانیه حقنده مقابله جاری اوله جغه ، تبعه اجنبیه سائر ایله تبعه ایرانیه آره سنده متحدث دعاوی واختلافات ومنازعات خصوصنده اصول سابقیه توفیق معامله اولنه جغه ، تبعه ایرانیه نک افلاس معاملاتک منحصر آ ایران سفارت وشهیندرخانه لرینه براقیلمسنه ، طرفین ممالکنده یکدیگرینک تبعه سی الک زیاده مظهر مساعده اولان دول اجنبیه سائرته تبعه سنک نائل اولدقلری امتیازات ومساعداته نائل اوله جقلرینه وبو خصوصه معامله متقابله اجرا ایدیه جکنه متدائر احکام وضع ایدلمشدر .

اشبو مقاوله نامه نک تاریخ عقدی اولان ۱۲۹۲ سنه سندن بر سنه مقدم ینه نظارت جلیله خارجییه ایله ایران سفارتی آره سنده بو طرزده بر مقاوله نامه عقد اولمش ایسه ده احکامی محدود قالمش وبالاخره سالف الذکر ۱۲۹۲ تاریخی مقاوله نامه امضا اولمشدر . احکام عمومیه سی نظر دفته آلتنجه بو مقاوله نامه ، باشند اشاعی تام بر قایتولاسیوندر . یالکز متقابل احکامی جامع اولمق اعتباریه دول اجنبیه ایله منعقد سائر قایتولاسیونلردن آریلیر بو، حکومت سنیه عثمانیه نک الک صوک قایتولاسیونی عداولته بیلور . تاریخ مذکور دن صکره ایران ایله بعض مقاولات عقد اولمش ایسه ده ، محدود ومعین مسأله

تفرع ايتىك اعتباريله خصوصيتى حائر وماهيت عهديه دن معرادر. بونلرده، تبعه ايرانيه نك
تميز مسئله تاليفاتلى حقده ۲۲ رجب ۱۲۹۱ سنه سى تاريخلى تعليمات و ۲۱ ذى القعدة
۱۲۹۲ تاريخلى طوز، توتون، تنباكويه دائر قرارنامه ايله اك صوك عقد اولنان دولت
عثمانيه - ايران تحديد حدودينه متعلق ۴ تشرين ثاني ۱۳۲۹ تاريخلى پروتوقولدر .

۱۰۴۹ تاريخندن اعتباراً ايران ايله عقد اولنان باجمله معاهدات و مقاولات نظر
تديقدن كچيرلگده معاهدات مذكورهنك همان كافه سى، دولت عثمانيه ايله ايران اره سنده
وقوعه كن محاربات و انقطاع مناسباتك حاصل ايتديكى تاثيراتك ازاله سنه و حال حربك
توليد ايتديكى احوالك حال طبيعى به ارجاعنه عائد احكامى جامع اولديغى كورولور. يالكز
احكام عموميه سى بالاده بيان اولنان ۱۲۹۲ تاريخلى مقاوله نامه، برحرب نتيجه سى اوليه رق
صرف طرفين تبعه سنك حقوقنى تعين و تثبيت ايتىك امنيه سيله عقد اولنمش و تماميله ماهيت
امتيازيه يى حائر بولنمش يكانه مقاوله نامه در .

آنحق قايتولاسيونلرك رفع والغاسى اوزرينه احكامى كلياً مفسوخ اولان سالف الذكر
۱۲۹۲ مقاوله نامه سى، طرفينه اك زياده مظهر مساعده ملت معامله سنى، متقابلاً بخش ايدملك
قيديه و ير مشدر. حال بوكه قايتولاسيونلرك رفع والغاسى اوزرينه تنظيم و موقع تطبيقه وضع
اولنان ممالك عثمانيه ده اجنيلرك حقوق و وظائفى حقده كي ۲۳ شباط ۱۳۳۰ تاريخلى
قانون موقت احكامنجه ممالك عثمانيه ده بالعموم اجنيلرك وضعيت حقوقيه لرى حقوق عموميه
دول احكام عموميه سنه استناد ايتديرلش وبو صورته ماهيت امتيازيه لرى كلياً رفع والغا
قيلنمش اولمنه نظراً اليوم بزده ايرانيلايچون « اك زياده مظهر مساعده ملت قاعده سى »
حقوق عموميه دول احكامى دائره سنده جريان ايتىك طبيعى اولديغى كي اوراده ده اك
زياده مظهر مساعده ملت معامله سى هانكى بر اساس دائره سنده جارى ايسه تبعه عثمانيه
حقده ده اونك دوام ايتىمى ضروريدر .

ايران حكومتك دول اجنيه ايله عقد ايلديكى معاهدات و مقاولاته كننجه ، ايرانك
باشليجه حال حربده بولنديغى دولتلر، روسيه وبالا خره انكلتره در. بناء عليه اشبوايكي دولت
ايله مهم معاهدات و مقاولات عقد ايلش وبالحاصله روسيه حكومتيله غايت واسع امتيازاتى
حاوى معاهده امضا ايلشدر . ايران حكومتى اولاً اسپانيا ايله ۱۸۴۲ ده تجارت و مودت
معاهده نامه سى عقد ايله آنى متعاقب فرانسه (۱۸۵۵) آمريكا (۱۸۵۶) آوستريا (۱۸۵۷)
انكلتره (۱۸۵۷) فلمنك (۱۸۵۷) بلچيكا (۱۸۵۷) دانيمارقه (۱۸۵۷) يونان (۱۸۶۱)

ایتالیا (۱۸۶۲) آلمان (۱۸۷۳) حکومتیه باشلیجه تجارت و مودت معاهداتی عقد ایلش واجبیلرک اڤ زیاده مظهر مساعده ملت قاعده سندن استفاده ایتلمی تأمین ایتشد و بو معاهداتده احکام امتیازیه واسع صورتده تعداد اولتماشدر . فقط ایرانک روسیه ایله عقد ایلدیکی « ترکمن چایی » نامی حائز مشهور ۵ شعبان ۱۲۴۴ ۱۴ شباط ۱۸۲۸ تاریخی معاهده نامه سنده امتیازات بربرر تعداد اولمش وبالا خره دول سائر « اڤ زیاده مظهر مساعده ملت » قاعده سنه توفیقاً اشبو امتیازاتدن تمامیه مستفید اولمشدر .

روسیه تاریخ مذکورده ایران ایله عقد ایلدیکی صلح معاهده نامه سی ایله برلکده عینی تاریخده ایرانه امضا ایتدیردیکی تجارت معاهده نامه سیله امتیازاتی استحصال ایتشد . معاهده مذکورده باشلیجه طقوز ماده دن عبارت اولوب احکام عمومی سی بوجه آتی تلخیصاً بیان اولتور :

برنجی ماده سی ، اصولنه موافق صورتده پساپورطی حامل اولان روس تبعه سنک ایرانک هر طرفنده سربسجه تجارت ایدیه جکنه و ایران تبعه سنکده بحرأ [دریای خزر دن] و برأ اموال تجاریه لرینی روسیه ممالکنه ادخال واوراده اموال مذکورده بی مبادله و مال صاتون آلوب ایرانه اخراج ایتلمی و اڤ زیاده نائل مساعده دولت تبعه سی مثللو معامله کورملرینه و ایرانده روسیه تبعه سندن بری وفات ایتدیکنده اموال منقوله و غیر منقوله سی اقرباسنه و یا خود شرکاسنه و بونلر بولمیدی حالدده روسیه سفارتنه و قونسولاتوسنه تسلیم ایدیه جکنه دائردر .

ایکنجی ماده سی ، طرفین تبعه سی میاننده امور تجارتیه متعلق عقد اولنه جق مقاولات و سنداتک روس قونسلوسی و ایران حاکمی طرفدن و قونسلوس بولنمیان یرلرده یالکزر حاکم طرفدن تصدیق و تثبیت ایدیه جکنی و بویاه مصدق مقاولات و سندات محاکمه معتبر اولوب سندسز انجق شهود اقامه سی ایله درمیان ایدیلن مدعیات مدعی علیه ک قبوله وابسته اولدیغی و بوجه بالا ایکی دولت تبعه سی آره سنده وقوعه کله جک تعهداتک ایفا و اجراسنه رعایت ایدوب عکس تقدیرده خسارات واقعه بی تضمین ایلیه جکنی و طرفین تبعه سنک امور افلاسیه سی نه وجهله رؤیت اولنه جغنی حاویدر .

اوچنجی ماده سی ، طرفین ممالکنده یوزده بش کمرک رسومی استیفا اولنه جغه متدائردر . دردنجی ماده سی ، ایران یا خود روسیه دیگر بر دولت ایله محارب اولورسه طرفین تبعه سی اموال و اشیا سیله محارب مملکته کیتمکدن ممنوع اولیه جق لرینی میندرد .

بشبحی ماده سی، ایرانده روسیه تبعه سنه حقوق تصرفیه بخش اولدیغنه و مأمورین
ایرانیه نك روسیه تبعه سنك مسكن و مكانلری نه جبراً كیره میه جكلری نه و عندالاقضا سفارت
و یا قونسولاتونك مساعده سیله و ترجمان و یا مأمور مخصوص حضور یله كیره سیله جكلری نه و اموال
و اشیائی معاینه ایله سیله جكلری نه دائر در .

آلنجی ماده سی، روسیه سفارت مأمورلریله قونسوللری نك روسیه دن صرف ذاتلری نه
مخصوص کتیره جكلری ملبوسات و مأكولاتك كرك رسومندن و رسوم سائر دن معفو
بوله جغنی و ایران مأمورلری نك ده روسیه ده بوخصوصده معامله متقابله مظهر اوله جكلری نی
و روسیه سفارتی و قونسولاتولری معیتده بولنان ایرانی مستخدمین روسیه حمایه سنده اوله جقلر
ایسه ده مستخدمین مزبور دن بری جرم ایقاع ایتدیکی حالدده مأمورین محلیه نك سفیره
و یا قونسولسلره در حال مراجعت ایله مرقومی طلب ایله جكلری نی و مشار و موصی الیهم ده
تسلیم خصوصنده مشکلات کوستر میه جكلری نی میندر .

یدنجی ماده سی، ایرانده روس تبعه سی آره سنده متکون منازعات و دعاوی بی روسیه
سفارت و قونسولاتولری فصل و حجم ایده جکنه و روسیه دولتی تبعه سیله دیگر بر دولت
اجنیه تبعه سی آره سنده متکون دعاوی بی ده طرفین رضا کوستر دکلری حالدده ینه روسیه سفارتیله
قونسولاتولری رؤیت ایله جکنه و روس تبعه سیله ایران تبعه سی آره سنده متکون
دعاوی ترجمان و یا دلکه حضور یله ایران حکام و ولاتی حضورنده فصل ای دیله جکنه
و قابل استیناف دعاوی نك طهران و تبریز دفتر خانه لرنده ترجمان و یا دلکه حضور یله رؤیت
اوله جغه متعلقدر .

سکزنجی ماده سی، ایرانده روس تبعه سی علیه رینه ایقاع جنایت ایدن روس تبعه سنك
محاکمه و تجزیه سی و جانی نك اخذ و توقیفی روسیه سفارت نه و قونسولاتولری نه راجع اوله جغه
و روسیه دولتی تبعه سنندن بری دیگر دولت تبعه سنندن برینك متهم اولدیغی بر جنایت
دعوا سنده مدخلدار اولور ایسه جرمه اشتراک نه دائر اماره قویه اولدجقه مرقومك
رنجیده ای دیله جکنه و روسیه تبعه سنندن بری بذاته بر جرم ایله متهم اولدقده روسیه
سفارتی طرفندن و یا خود روس قونسولاتوسی جانبندن بر مأمور مخصوص اولدجقه
دعواسی رؤیت اولنه میه جغه و بعدالحکم جزاسی روسیه ده کورمك اوزره سفارت نه
و یا قونسولاتویه تسلیم اوله جغه دائر در .

طقوزنجی ماده، اشبو معاهده مندرجاتنك تمامی اجرا سنه طرفین متعهد اولدیغنی

ودولتین مأموریندن معاهده خلافه حرکته بولنه جقلرک مسؤل اوله جقلری و مخالفتی تحقق ایدنک عزل ایدیله جکنی و بو معاهده ترکمن چایی معاهده سنک اوتجی ماده سنک احکامنه مستنداً احضار ایدلمش اولمغه بوراده مندرج مواد معاهده صلحیه ده لفظ بلفظ مندرج کبی قوت و قیمتی حائر بولنه جغنی میندر .

ایرانک ۱۸۴۲ سنه سندن ابتداراً دول اجنیه ایله عقد ایلدیکی معاهداته اساس اولان ایشته بو ۱۸۲۸ تاریخی ترکمن چایی معاهده نامه سیدرکه تام بر قایتولاسیوندر . شوراسی نظر دقته آلملیدرکه ایرانک عقد ایتدیکی بالجله معاهدات و مقاولات ، طرفین متعاقدین مملکتنده جاری قوانین و نظاماته توفیقاً طرفین تبعه سنک معامله متقابله کورملری اساسنه مستند اولدیگی کبی اکثریسی ده معین بر زمان ایچون عقد اولمشدر . بالطبع بو قیود معاهداتک ماهیت امتیازییه حائر اولملرینه اعلام مانع اولمامشدر . ایرانک دول اجنیه ایله اولان وضعیت حقوقیه سی بالاده بیان اولنان معاهداده مسطور احکام ایله تعین ایتمکده در . اصل ایرانک تشکیلاتنه کلنجه ، اساس اعتباریله ایران منتظم بر حکومت ایچون آرانیلان اوصافی اصلاحاتر دکلددر . تشکیلات اداریه سی تامیله قرون وسطایه مخصوص بر طرزده جریان ایتمکده در . حاکم عنوانی طاشیان والیر ، هر خصوصه حاکم مستقل بولنمقده درلر .

تشکیلات عدلیه سی ایسه تماماً مفقوددر . ایرانده بین التبعه دعاوی حقوقیه مأمورین ملکیه نك الك بیوکی اولان حاکم طرفندن رؤیت اولنور . ویریلن حکملر قطعیدر . استیناف و تمیزی یوقدر . دعاوینک رؤیتی همه حال مجلس اداره نك حضوریه مشروط دکلددر . حاکم هر هانکی بر دعوی ایچون دیلر سه مجلس اداره نی طویلار ؛ اعضانک رأینه مراجعت ایدر . دیلر سه مجلس اداره اعضاسنک رأینه مراجعت ایتمکسزین حکم ایدر .

مواد جزائیه ده عینی صورته حاکم طرفندن رؤیت اولنور . بالکز تبرزده رئیس عدلیه نامیله ینه حاکم طرفندن منصوب بر مأمور بولنمقده درکه رفاقتنده کی هیئتله برابر توزیع عدالت ایله مکلفدر . مسائل شرعیه تماس ایدن وصایت ، وراثت ، طلاق ، نکاح کبی مسائل شرعیه مجتهدلر طرفندن حل اولنور . هر کس ایستدیکی مجتهده مراجعتده حرددر . مسائل شرعیه دن ماعدا فراغ و انتقال معاملاتی کبی حقوق تصرفیه عائد معاملاتک تصدیق مجتهدلرک عهده سنده در . فراغ و انتقال معاملاتی ، بایع ایله مشتری آره سنده تنظیم یدیلن سندانک مجتهد طرفندن تصدیق قیلنمسیله مرعی و معتبر اولور .

تبعه ایرانیه ایله اجانب بینده تحدث ایدن دعاوی هرولاینده بولنان اجنیلرک مصالحنه مأمور کارگذار تعیر اولنان ذوات طرفدن معاهدات منعقدہ احکامنه توفیقاً رؤیت اولنور و اثنای تدقیقه اجنیلرک منسوب اولدینی قونسلوسخانه ترجمانی ویا دلکھ سی بولندیریلور . ایکی اجنبی بینده کی دعاوی منسوب اولدقلى قونسلوسخانه لرجه حل و فصل اولنور . عینی تابعیتده کی اجنیلر آردسندہ متحدث دعاوی منسوب اولدقلى قونسلوسخانه لر طرفدن رؤیت ایدیلیر .

ایرانده مسائل حقوقیه و جزائیہ هیچ بر اساس عدلیہ مستند اولمقسزین جریان ایتمکده و اجنیلرک کافه حقوقی امتیازات واسعه ایله مؤمن بولمقده در .

حقوق فاکولته سی دوکتورا قسم سیاسی

دیپلوماسی حقوقی معلمی

سعاد مختار

